



FRAKTION

CHAMBRE DES DÉPUTÉS

Entrée le:

23 JAN. 2018

3580

**Här Mars di Bartolomeo**  
**President vun der Chamber**

**Lëtzebuerg, den 23. Januar 2018**

Här President,

Esou ewéi den Artikel 80 vum Chambersreglement et virgesäit bieden ech Iech dës parlamentaresch Fro iwwert Ackerbauschoul zu Ettelbréck un den Här Nohaltegkeet- an Infrastrukturminister weiderzeleeden.

D'Ackerbauschoul ass déi eelste Berufsschoul déi et hei zu Lëtzebuerg gëtt. Si besteet zënter 1883 zu Ettelbréck. Beim 125jährige Jubiläum 2008, wéi och 2017 während der Ausstellung, 85 Joer an der Kinnekswiss' konnt een Deel vun dem historesche Material, dat d'Schoul besëtzt dem Publique gewise ginn.

Zu dëser Kollektioun gehéiere vill onrestauréiert an e puer restauréiert al landwirtschaftlech Maschinnen, Dokumenter, Kaarten, d'Ariichtung vun der Kapell, Panneauen, ganz vill Fotoen, Biller a Portraiten aus dem 19. bis 21. Jorhonnert, e puer 1'000 Bicher vum 18. Jorhonnert bis haut, Déiere-Präparater aus dem 19. Jorhonnert wouzou och den leschten Adler vu Lëtzebuerg gehéiert, Miwwele vun 1932 bis haut, an nach Villes méi....

Et ass evident dat d'Geschicht vun dëser Schoul ee wichtegen Deel vun der Geschicht vum Lëtzebuerger Land duerstelt.

Déi nei Ackerbauschoul wäert den Aussoe vum Minister Bausch no 2020 zu Gilsdorf kënnen opgoen.

An deem Kontext wollt ech dem Här Nohaltegkeet- an Infrastrukturminister folgend Froen stellen :

- Wou kann an Zukunft dëst geschichtlech wäertvollt Material konservéiert ginn?
- Soll d'Geschicht vun der Ackerbauschoul resp. dat geschichtlecht Material dem Publique a Form vun enger permanenter Ausstellung kënnen zougänglech gemaach ginn?
- Wa jo - wou wär dofir Plaz?
- Wat geschitt matt dem Gebai vun der aktueller Ackerbauschoul, dem Internat an dem Gebai vum Laboratoire vun der ASTA? Ginn des Gebaier integral fir den Lycée Technique vun Ettelbréck gebraucht oder bleift hei nach Raum frei? Zu wéi enge konkreten Zwecker sollen dës Gebaier an Zukunft genotzt ginn?

- Menger Informatiounen no ass eng Ufro do, fir dat 85 Joer alt Gebai vun der Ackerbauschoul zu Ettelbréck klasséieren ze loossen. Kann de Minister mer dëst bestätegen?
- Wa jo, bis wéini kann decidéiert ginn ob d'Gebai klasséiert soll ginn?
- Wat geschitt mat der Kapell an de Mosaikfënsteren vum lëtzebuergesche Kënschtler Gustave Zanter vun 1957 déi dréngend restauréiert misste ginn?

Här President, ech bieden Iech mäin déifste Respekt unzehuelen.



**Martine Hansen**  
**Députéiert**



Luxembourg, le 19 MARS 2018



**Monsieur Fernand Etgen**  
**Ministre aux Relations avec**  
**le Parlement**

**Service Central de Législation**  
**43, boulevard F.D. Roosevelt**  
**L – 2450 Luxembourg**

Monsieur le Ministre,

J'ai l'honneur de vous communiquer en annexe la réponse à la question parlementaire N°3580 du 23 janvier 2018 de l'honorable députée Madame Martine Hansen, concernant le Lycée technique agricole, tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

**François Bausch**

**Ministre du Développement durable**  
**et des Infrastructures**



**Äntwert vum Här François Bausch, Ministre fir nohalteg Entwécklung an  
Infrastrukturen op di parlamentaresch Ufro n° 3580  
vun der Madame Deputéierten Martine Hansen**

A senger parlamentarescher Ufro, stellt déi honorabele Deputéiert Madame Martine Hansen e puer Froen zur Ackerbau Schoul zu Gilsduerf.

Nodeems an Zesummenarbecht mat den verantwortleche Leit vun der Ackerbauschoul den aktuelle Stand vun hire Kollektiounen an hir zukünfteg Art an Weis se ze erhalen, analyséiert gouf, kann een Deel vun den alen Objeten, esou wéi Biller, Fotoen, Kaarten a Bicher, am Agangsberäich vum neie Gebai zu Gilsduerf, eventuell och an der Direktioun oder an der Proffekonferenz ausgestellt ginn.

Déi genee Détailler dovun wärten awer nach tëschend der Direktioun vun der Ackerbauschoul an dem Educatiounsministère festgeluecht ginn.

Déi zukünfteg Entwécklung vum Lycée technique vun Ettelbréck gesäit eng Erweiterung vun hiren Raimlechkeeten vir, an deem een de fréiere Site vun der Ackerbauschoul, vum fréiere Pensionat Saint-Joseph, sou wéi vun de Laboratoirë vun der ASTA mat bäihëlt, nodeems déi Servicer an hir nei Gebailechkeete geplënnert sinn.

Ausser den Zären an den Maschinnenhaalen, ginn déi bestoend Infrastrukture fir dës Zwecker ëmgebaut a renovéiert. D'Renovatioun vun den historeschen Elementer, wéi an dësem Fall bei de Mosaikfënsteren, gëtt mat der néideger Suergfalt gemaach fir de Patrimoine vum Staat ze valoriséieren, an dat an Zesummenaarbecht mam Service vun der nationaler Denkmalpflege. Eng zukünfteg Benetzung vun der Kapell als Bibliothék wier zum Beispill sécherlech denkbar. Eng Demande fir eng national Protektioun vum Gebai wou aktuell d'Ackerbauschoul dran ass, ass am Dezember 2017 eragereecht ginn.

Den Dossier ass vum Service des sites et monuments examinéiert ginn a gëtt demnächst an der Commission des sites et monuments nationaux virgedroen. Duerno kann dann eng Decisioun fir eng national Protektioun geholl gin.